

Na osnovu člana 14. stav 2. Zakona o slatkovodnom ribarstvu («Službene novine Federacije BiH»), broj 64/04), federalni ministar poljoprivrede, vodoprivrede i šumarstva, d o n o s i

P R A V I L N I K

O NAČINU, ALATIMA I SREDSTVIMA KOJIMA SE OBAVLJA RIBOLOV

Član 1.

Ovim pravilnikom propisuje se namjena, vrsta i količina ribolovnih alata i opreme u privrednom ribolovu, popis ulova u privrednom ribolovu, način, vrsta i količina ribolovnih alata, opreme i mamaca u sportsko-rekreativnom ribolovu, lovostaj, minimalna duljina ulovljene ribe, maksimalni dozvoljeni ulov i popis ulova u sportsko-rekreativnom ribolovu.

Član 2.

Za obavljanje privrednog ribolova mogu se upotrebljavati svi mrežarski i udičarski alati, izuzev mreže tzv. „povlakače“ trajno i mreže tzv. „sačmarice“ u periodu od 1.aprila do 16.juna.

Za obavljanje privrednog ribolova, po jednoj dozvoli dozvoljena je upotreba sljedećih ribolovnih alata:

1. jedna mreža plivajuća, dužine do 120 metara, visine mrežnog tega najviše do 4 metra veličine oka od 5 cm do 9 cm računajući od čvora do čvora;
2. jedna mreža dubinska, dužine do 120 metara, visine mrežnog tega do 3 metra veličine oka od 5 cm do 12 cm računajući od čvora do čvora;
3. mreže samolovke, ukupne dužine do 250 metara, visine mrežnog tega do 6 metara veličine oka od 5 cm do 9 cm računajući od čvora do čvora;
4. jedna mreža sačmarica, promjera do 180 cm veličine oka do 4 cm računajući od čvora do čvora;
5. jedna mreža setka-keca, veličine oka do 3 cm računajući od čvora do čvora;
6. do 20 komada vrša-vrška, veličine oka od najmanje 4 cm računajući od čvora do čvora;
7. do 10 komada vrša-senker, veličine oka od najmanje 4 cm računajući od čvora do čvora;
8. pet štapova sa po tri udice.

Član 3.

Prilikom obavljanja ribolova smije se koristiti sljedeća oprema za ribolov:

1. mreža za prihvatanje ribe (meredov ili sak) – dva komada;
2. mreža čuvarica za spremanje ribe (nec);
3. kuka – dva komada;
4. jedna bućka.

Član 4.

Ribolovni alati iz člana 2. ovog Pravilnika moraju biti označeni propisanim oznakama.

Oznaka iz stava 1. ovog člana sastoji se od metalne pločice izrađene od nekorozivnog metala promjera do 10 cm, na kojoj je ugravirano ime fizičkog ili pravnog lica na koje glasi dozvola, broj dozvole, redni broj alata i oznaka ribolovne zone.

Oznaka iz stava 1. ovog člana postavlja se na početak i kraj ribolovnog alata.

Član 5.

Prilikom obavljanja ribolova smije se koristiti samo plovilo čije je ime ili registarska oznaka upisana u dozvolu.

U plovilu se za obavljanje ribolova pored korisnika dozvole može nalaziti još jedno lice, čija se pomoć može koristiti u ribolovu.

Član 6.

Korisnik dozvole obavezan je voditi:

1. evidenciju dnevnog ulova;
2. evidenciju mjesečnog ulova;
3. evidenciju godišnjeg ulova.

Član 7.

Korisnik dozvole dužan je:

1. najkasnije u roku od 12 sati po povratku iz ribolova upisati dnevni ulov;
2. najkasnije do 10. dana tekućeg mjeseca Federalnom ministarstvu poljoprivrede, vodoprivrede i šumarstva (u daljem tekstu: Federalno ministarstvo) dostaviti evidenciju mjesečnog ulova za prethodni mjesec;
3. najkasnije do 31. januara tekuće godine Federalnom ministarstvu dostaviti evidenciju godišnjeg ulova za prethodnu godinu.

Član 8.

Sportsko-rekreativni ribolov smije se obavljati s najviše dva ribolovna štapa sa po dvije udice i jednim ribolovnim štapom sa plovkom i jednom udicom.

Odredba stava 1. ovog člana ne odnosi se na umjetni mamac – varalicu.

Član 9.

Sportsko-rekreativni ribolov salmonidnih vrsta riba (svih vrsta pastrmke, mladice, glavatice i lipljena) smije se obavljati samo s jednim ribolovnim štapom.

Ribolovni štap iz stava 1. ovog člana smije imati najviše jedan umjetni mamac (mušicu ili varalicu), bez utega.

Član 10.

Izuev od odredbe stava 2. član 9. pri vršenju sportsko-rekreativnog ribolova na ostale vrste riba mogu se koristiti svi prirodni i umjetni mamci, osim ikre.

Zabranjeno je loviti ribu uz upotrebu strane (alohtone) vrste ribe (žive ili mrtve) kao mamca.

Član 11.

Prilikom obavljanja sportskog ribolova smije se koristiti sljedeća oprema:

1. jedna mreža za prihvat ribe (sak);
2. jedna mreža čuvarica za spremanje ribe (nec);
3. jedna kuka.

Član 12.

Sportsko-rekreativni ribolov obavlja se samo s obale ribolovne vode, bez upotrebe čamca i drugih sličnih plovnih objekata i naprava.

Izuev od odredbe stava 1. ovog člana upotrebu čamca za obavljanje sportsko-rekreativnog ribolova određuje korisnik ribarskog područja.

Član 13.

Zabranjuje se obavljanje ribolova na pojedine vrste riba u određenom periodu godine, za vrijeme kojeg se one ne smiju loviti, prerađivati i stavljati u promet.

Određuje se lovostaj za:

1. neretvansku mekousnu pastrmku (*Salmothymus obtusirostris oxyrhynchus* Steind.) od 1. oktobra do 30. aprila;
2. potočnu pastrmku (*Salmo trutta m. fario* L.) od 1. oktobra do 28. februara;

3. jezersku pastrmku (*Salmo trutta m. lacustris* L.) od 1.oktobra do 28. februara;
4. mladicu (*Hucho hucho* L.) od 1.januara do 31. maja;
5. glavaticu (*Salmo marmoratus* Cuvier) od 1.oktobra do 31.marta;
6. lipljena (*Thymallus thymallus* L.) od 1.januara do 30. aprila;
7. šarana (*Cyprinus carpio* L.) od 1.aprila do 31.maja;
8. štuku (*Esox lucius* L.) od 1.februara do 31.marta;
9. smuđa (*Stizostedion lucioperca* L.) od 1.marta do 31. maja;
10. soma (*Silurus glanis* L.) od 1.aprila do 15.juna;
11. kečigu (*Acipenser ruthenus* L.) od 01. marta do 31.maja;

Član 14.

Prijedlog za određivanje lovostaja za pojedine vrste riba koje nisu obuhvaćene članom 13. ovog Pravilnika, može podnijeti korisnik ribolovnog područja Federalnom ministarstvu.

Prijedlog iz stava 1. ovog člana može se odnositi na cijelo ribolovno područje ili na njegov određeni dio.

Član 15.

Zabranjuje se lov sljedećih vrsta riba čija je dužina ispod:

1. neretvanska mekousna pastrmka (<i>Salmothymus obtusirostris oxyrhynchus</i> Steindachner)	30 cm
2. potočna pastrmka (<i>Salmo trutta m. fario</i> L.)	25 cm
3. jezerska pastrmka (<i>Salmo trutta m. lacustris</i> L.)	40 cm
4. kalifornijska pastrmka (<i>Onchorhynchus mykiss</i> Walbaum)	25 cm
5. mladica (<i>Hucho hucho</i> L.)	70 cm
6. glavatica (<i>Salmo marmoratus</i> Cuvier)	60 cm
7. lipljen (<i>Thymallus thymallus</i> L.)	30 cm
8. potočna zlatovčica (<i>Salvelinus fontinalis</i> Mitchill)	25 cm
9. jezerska zlatovčica (<i>Salvelinus alpinus</i> L.)	25 cm
10. štuka (<i>Esox lucius</i> L.)	40 cm
11. šaran (<i>Cyprinus carpio</i> L.)	35 cm
12. linjak (<i>Tinca tinca</i> L.)	20 cm
13. mrena (<i>Barbus barbus</i> L.)	35 cm
14. som (<i>Silurus glanis</i> L.)	60 cm
15. smuđ (<i>Stizostedion lucioperca</i> L.)	40 cm
16. kečiga (<i>Acipenser ruthenus</i> L.)	40 cm
17. bolen (<i>Aspius aspius</i> L.)	20 cm
18. klen (<i>Leuciscus cephalus</i> L.)	20 cm
19. jez (<i>Leuciscus idus</i> L.)	20 cm
20. plotica (<i>Rutilus pigus virgo</i> Heckel)	15 cm
21. deverika (<i>Abramis brama</i> L.)	20 cm
22. škobalj (<i>Chondrostoma nasus</i> L.)	25 cm
23. šljivar (<i>Vimba vimba</i> L.)	20 cm
24. bucov (<i>Cahalcalburmus chalcoides</i> Gueld.)	30 cm
25. manić (<i>Lota lota</i> L.)	20 cm
26. veliki vretenar	25 cm
27. mali vretenar	15 cm

Član 16.

Ribe se ne smiju loviti ispod propisane dužine.

Propisana dužina predstavlja totalnu dužinu tijela ribe, mjereno od početka usta (vrh rila) do vrha dužeg krakarepnog peraja.

Član 17.

Svi primjerci riba ulovljeni za vrijeme lovostaja određenog članom 13. ovog Pravilnika kao i svi primjerci riba čija je dužina manja od dužine određene članom 15. ovog Pravilnika moraju se odmah vratiti u ribolovnu vodu, na mjestu ulova.

Član 18.

Dozvoljeni maksimalni ulov pri vršenju sportsko-rekreativnog ribolova iznosi:

1. jedna mladica ili jedna glavatica dnevno, a najviše tri komada godišnje;
2. pet pastrmki dnevno;
3. tri neretvanske mekousne pastrmke ili lipljena dnevno;
4. četiri soma, smuđa, šarana, štuke i kečige dnevno;
5. deset škobaljja, plotica, deverika i kljena dnevno.

U slučaju ulova raznih vrsta riba iz tačke 3. stava 1. ovoga člana maksimalan broj je uvijek tri, riba iz tačke 4. maksimalan je broj uvijek četiri, a iz tačke 5. maksimalan je broj uvijek deset.

Član 19.

Ribič je obavezan nakon ribolova, a prije odlaska sa ribolovne vode, upisati podatke o ulovu u sportsko-rekreativnom ribolovu (vrste i količina ribe) u obrazac evidencije dnevnog ulova.

Obrazac iz stava 1. ovog člana sastavni je dio dozvole za sportsko-rekreativni ribolov.

Član 20.

Ribič je obavezan na kraju ribolovne sezone, a najkasnije do kraja januara za prethodnu godinu, korisniku ribolovnog područja dostavi izvještaj o godišnjem ulovu.

Korisnik ribolovnog područja je obavezan dostaviti podatke o ukupnom godišnjem ulovu u sportsko-rekreativnom ribolovu (količine i vrste riba) Ribolovnom savezu Federacije Bosne i Hercegovine (u daljem tekstu: Savez) najkasnije do 1.marta za prethodnu godinu.

Savez je obavezan dostaviti podatke o ukupnom godišnjem ulovu u sportsko-rekreativnom ribolovu Federalnom ministarstvu najkasnije do 15.aprila za prethodnu godinu.

Član 21.

Danom stupanja na snagu ovoga pravilnika prestaje važiti Pravilnik o sredstvima i mamcima za vršenje ribolova, dozvoljenom maksimalnom ulovu, minimalnim mjerama i lovostajima («Službeni list SR BiH», broj 19/80).

Član 22.

Ovaj pravilnik stupa na snagu osmog dana od dana objavljivanja u «Službenim novinama Federacije BiH».

MINISTAR
Marinko Božić, dipl.ing.agr.

Broj: 01-02- 337/05
Sarajevo, oktobar 2005.godine

Objavljeno u „Službenim novinama Federacije BiH“, broj: 63/05 od 02.11.2005.godine